

Alþingi
Erindi nr. P 140/1034
komudagur 14.2.2012

NASDAQ OMX™

Nefndasvið Alþingis
Austurstræti 8-10
150 REYKJAVÍK

Reykjavík, 14. febrúar 2012
Tilvísun 111
MKÁ

Efni: Umsögn um frumvarp til laga um breytingu á lögum um kjararáð og lögum um Stjórnarráð Íslands, 365. mál.

NASDAQ OMX Iceland hf. („Kauphöllin“) vill koma á framfæri athugasemdum við frumvarp til laga um breytingu á lögum um kjararáð nr. 47/2006, þá sérstaklega 3. gr. frumvarpsins þar sem gerð er tillaga að breytingum á núgildandi ákvæði 1. mgr. 8. gr. Í núgildandi ákvæði 1. mgr. 8. gr. laganna kemur eftirfarandi fram:

Við úrlausn mála skal kjararáð gæta innbyrðis samræmis í starfskjörum þeim sem það ákveður og að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. [Við ákvörðun sína skal kjararáð gæta þess að föst laun fyrir dagvinnu, annarra en forseta Íslands, verði ekki hærri en föst laun forsætisráðherra skv. 3. gr.]¹⁾ Við ákvörðun launakjara skv. 4. gr. skal kjararáð sérstaklega gæta samræmis milli þeirra og þeirra kjara hjá ríkinu sem greidd eru á grundvelli kjarasamninga annars vegar og ákvarðana kjararáðs skv. 3. gr. hins vegar.“

Í 3. gr. frumvarpsins er lögð til breyting á 1. mgr. 8. gr. laganna þar sem ætlunin er að bæta við ákvæðið 3. másl. svohljóðandi:

Frá þessu getur kjararáð þó vikið í rökstuddum tilvikum ef slík viðmiðun mundi leiða til verulegs misræmis við markmið 1. másl. og 2. mgr.

Í 2. mgr. 1. gr. laganna er gildissvið laganna afmarkað með þeim hætti að kjararáð skuli m.a. ákveða laun og starfskjör framkvæmdastjóra hlutafélaga og annars konar félaga, einkaréttareðlis, sem eru að meiri hluta í eigu ríkisins og félaga sem eru að meiri hluta í eigu félaga sem undir málsgreinina falla. Ljóst er af umræddu ákvæði að kjararáði er veitt heimild til stórfelldrar íhlutunar í rekstur hlutafélaga og því er sérstök ástæða til að íhuga hvaða afleiðingar slíkt geti haft.

Ljóst er að umrædd breyting veitir kjararáði svigrúm í ákveðnum tilfellum til að víkja frá því viðmiði sem kveðið er á um í 2. ml. 1. mgr. 8. gr. laganna um að föst laun fyrir dagvinnu skuli ekki vera hærri en föst laun forsætisráðherra. Þó er meginreglan áfram sú að laun framkvæmdastjóra og hlutafélaga sem eru að meiri hluta í eigu ríkisins skulu ákvörðuð af kjararáði og skulu þau að meginstefnu til ekki vera hærri en laun forsætisráðherra.

Kauphöllin telur að þó svo að ákvæði 3. gr. frumvarpsins veiti kjararáði takmarkaða heimild til að víkja frá viðmiðum 1. mgr. 8. gr. laganna þá sé ástæða til að ganga lengra. Kauphöllin telur

réttast að þau hlutafélög sem ríkið hefur eignast meirihluta í sitji við sama borð og önnur félög þegar ákvarða á laun og starfskjör framkvæmdastjóra. Það má efast um að hagsmunir félagsins séu fólgnir í því að færa slíkt vald úr höndum stjórnar félagsins, sem þekkir til starfsemi þess og gerir sér grein fyrir þeirri ábyrgð sem framkvæmdastjóri þarf að geta borið og hvaða hæfniskröfur hann þarf að uppfylla, í hendur kjararáði sem er utanaðkomandi og hefur takmarkaðar forsendur til að byggja á við mat sitt og ekki sama skilning á rekstri félagsins. Er þetta í samræmi við hefðbundna stjórnarhætti félaga og meginreglu um vald félagsstjórnar til að ákvarða um laun og starfskjör framkvæmdastjóra hlutafélaga, sbr. 2. mgr. 79. gr. hlutafélagalaga nr. 2/1995.

Kauphöllin vill þá sérstaklega vekja athygli á þeim sjónarmiðum sem koma upp í tengslum við skráningu félaga sem falla undir gildissvið laganna á skipulegan verðbréfamarkað. Slík takmörkun á því valdi sem lögin boða og venjulega er í höndum stjórnar hlutafélaga er líkleg til að skerða samkeppnisstöðu félaga og útiloka að þau geti keppt á jafnréttisgrundvelli við önnur félög á markaði. Þetta takmarkar þá sérstaklega möguleika þeirra til að keppa á jafnréttisgrundvelli um starfsfólk sem býr yfir reynslu og þekkingu á stjórnun og rekstri félaga sem skráð eru á skipulegan verðbréfamarkað.

Kauphöllin vill vekja athygli á því að til þess getur komið að hlutafélög sem eru að meiri hluta í eigu ríkisins muni sækja um skráningu í Kauphöll. Kauphöllin telur það óæskilegt að slík félög búi ekki við sömu stjórnarhætti og önnur félög sem skráð eru á skipulegan verðbréfamarkað. Það sé því nauðsynlegt, ef ætlunin er að láta lögin gilda áfram um hlutafélög sem eru að meiri hluta í eigu ríkisins, að færa inn í lögin sérstaka undanþágu varðandi félög sem sótt hafa um skráningu eða hafa þegar verið skráð á skipulegan verðbréfamarkað. Verði slíkt ekki gert er líklegt að það muni skekkja samkeppnisstöðu slíkra félaga.

Virðingarfyllst,

Magnús Kristinn Ásgeirsson,
lögfræðingur